

Da poi disnar non fo 0, per non esser 0 da conto.

*A dì 7.* Fo consejo di X. È da saper, le mostre di le zente d'arme nostre fono fate e date principio, a di 4, *videlicet* a Lonigo et San Bonifacio in veronese, dove vi andò sier Anzolo Trivixan, capetanio di Padoa, con Piero Philippo Muro Novo et Zuan Giacomo de Vil Mercha', vice colaterali; et l'altra fu fata a Gedi, *videlicet* dil conte di Pitiano, *licet* non sia ubligà a mostra, et a . . . ., dove vi andò sier Zuan Paulo Gradenigo, venuto podestà et capetanio di Crema, et Hironimo da Monte, vice colateral, perchè Zuan Pilippo Aureliano, coleteral, *noviter* era morto, *etc.*

*A dì 8.* Da poi disnar fo pregadi; sier Antonio Trun intrò savio dil consejo; et fo leto letere di Franza, Roma et Napoli. O da conto; el papa è fuora di Roma a piaceri.

*Di sier Vincenzo Querini, dotor, orator nostro, date a Brisele.* Di certe zostre fate ivi, dov' è il re, zostrò *etiam* il fiol archiducha, et altre cosse; et intese, hessendo a piaceri, l'aviso di le noze di Franza et Spagna *etc.*, *ut in eis.*

Fu posto, per i consieri, et fo opinion di sier Marco Bolani, che *de cætero*, justa la parte presa a di 17 avosto 1497, non si fazi più voxe im pregadi, se non li savij di colegio, provedadori di campo, provedadori sora l'arsenal, et syndici e pagadori, cassieri et oratori; tutte le altre voxe, che si fevano per pregadi, si fazi per gran consejo, sotto pena di ducati 200 *etc.*; e la parte si meterà in gran consejo. Et sier Francesco Diedo, cao di 40, contradise, dicendo, li rezimenti di Romagna, e lochi aquistadi di novo, era ben fato a farli per gran consejo, ma li X savij, e provedadori sora l'armar, era ben non farli per gran consejo, ma per pregadi; sier Marco Bolani li rispose. Andò le do parte: quella di consieri 130, dil Diedo 50. Et fu presa la parte bona et optima, et si farà mior elezione, et si removerà le pregierie.

Fo scritto in Franza, a l'orator, zereha a la congratulation col re di le noze con Spagna. Fo varie opinion, *tandem* spazà *bona verba etc.*

Fu fato uno savio di terra ferma, in luogo di sier Zorzi Emo, che refudò, sier Zacaria Contarini, el cavalier, fo savio di terra ferma, el qual per esser amalato, refudoe.

Morite sier Polo Trivixan, el cavalier, fo capetanio a Padoa, et savio dil consejo, homo molto zovene et in gran reputation. Fo *ultimate* di 4 a la procuratia, havia anni . . . , senza fioli, et si 'l viveva *fortasse* saria stà doxe. Or *accidit*, che li fradelli, sier

Jacomo et sier Piero, con la moglie fono a parole, *adeo* per la Signoria fo mandati sier Zorzi Pixani, dotor, cavalier, sier Alvise Zorzi, sier Antonio Züstignan, dotor, ivi, con li scrivani et oficiali, a sedar li tumulti e bolar le camere e metervi bona custodia, ma poi li parenti il zorno driedo veneno a la Signoria, a dir erano d'acordo *etc.* La Signoria dia aver danari da lui; fo trovato testamento; fo sepulto *honorifice* a Santa Maria Formosa questo di poi.

*A dì 9.* Da poi disnar fo colegio di la Signoria, per il dazio di la messetaria, o feno et deteno audientia.

*A dì 10.* Fo colegio di la Signoria et audientia. In Rialto fo avisi di Roma, per letere di sier Hironimo Lipomano, fo dal banco, di 6, a' soi, esser nova de li, di 15 dil passato, di Barzelona, come l'arma' yspana havia otenuto Oran in Barbaria, *tamen* non fo vero, come dirò di soto.

*A dì 11.* Fo colegio di le aque; et ultimono la cossa, *ut patet.*

*A dì 12.* Fo gran consejo. Fu posto, per i consieri, la parte presa im pregadi, non far più voxe im pregadi. Ave 31 di non sinceri, 81 di no, 1245 di la parte; e fu presa.

*Item*, fu posto, per li consieri, che sier Hironimo Donado, dotor, va ducha in Candia, li sia perlongà il tempo di andar, per aver pasazo sicuro, fino per tuto dezembrio *etc.*; fu presa, *ergo* resta in Candia sier Beneto Sanudo, capetanio et vice ducha, sollo. Ave 671, 286, 8.

*Item*, fu posto che i rectori di le terre aquistà di novo si fazi per questo consejo, con la pena. Ave 1243, 81, 3.

*A dì 13.* Fo consejo di X, con zonta di colegio e altri. Et per navilij convicini, venuti di Candia, se intese, el provedador Contarini di l'armada havia preso certe fuste di turchi corsari in Arzipielago a presso Tine *etc.* *Item*, si ave avisi, che si aria formenti di Turchia, *adeo* li formenti comenzono a calar. *Item*, se intese a bocha, il turco era morto; non fu vero.

*A dì 14.* Fo da poi disnar colegio di la Signoria e savij.

*A dì 15.* Fo consejo di X.

*A dì 16.* Fo pregadi. Fo leto molte letere, et fato scurtinio di savio di terra ferma, in luogo di sier Zacaria Contarini, el cavalier, refudò; et *etiam* esso sier Zacaria fu tolto, et niun non passò; fo meglio sier Alvise di Prioli, *quondam* sier Piero, procurator, li manchò do ballote. Et leto le letere, restò consejo di X suso.